

東

華

錄

東華錄

臣 王先謙

臣 周澍 著恭校

秋七月癸未朔轉張可前爲刑部左侍郎以王日燾爲刑部右侍郎

由河南巡撫遷

○以正白旗故一等阿思哈尼哈番賴塔長子費華冷

襲職○乙酉戶部議覆御史戴通奏坐糧廳監督員缺應將清廉

賢能官員保舉差往 上曰各部院官員不稱職者許堂官不時

參奏傳諭已久未見舉行至於保舉揀選不過特旨偶一行之若

以此爲定例則資俸深者既有壅滯之患而奔競之端亦卽由此

而生保舉著不准行○丙戌督修下河工部右侍郎孫在豐及帶

往司官鄭都等陞辭 上諭孫在豐曰朕前因巡幸江南見高寶

興鹽山江泰等處積水汪洋民罹昏墊朕甚憫之應行開濬下河

疏通海口俾水有所歸民間始得耕種特發帑金拯救七邑災民  
屢集廷議兼詢輿情允協僉謀事當釐舉茲命爾前往淮揚所屬  
下河一帶車路等河並串場河白駒丁溪草堰場等口挑濬事務  
專屬於爾監修爾宜往來親歷多方經畫講求源流脈絡次第興  
工督率帶去司官等務實心任事毋得怠忽擾害其司道府廳州  
縣等官如有違玩貽誤及土豪紳衿妄行干預包攬生事阻撓工  
程者指名參奏濬過工程丈尺用過夫料數目造冊畫圖貼說具  
奏爾受茲專委須竭忠盡力悉心區處速竣大工使海口疏通水  
消田墾烝黎復業以副朕救民至意如因循怠忽虛費財力責有  
所歸爾其慎之諭鄭都等曰爾等雖經部院辦事但治河非所熟  
練今將爾等差往必當同心協力務期有成毋得各執己見侍郎  
孫在豐將應修地方派與爾等須各遵所派料理不得圖易辭難

互相推諉○轉薩海爲吏部左侍郎調傅臘塔爲吏部右侍郎

由戶部

調○轉額星格爲禮部左侍郎調覺羅孫果爲禮部右侍郎

由禮部

調○己丑以麻爾圖爲戶部右侍郎

由內閣學士遷

拉篤祜爲理藩院右

侍郎

由左副都御史遷

○辛卯改廣西山棗山角二驛丞爲巡檢裁常平

廣盈二倉大使北山寨巡檢建武火煙州門左江四驛丞○癸巳

達賴喇嘛遣使奏曰 皇上俯鑒鄂齊爾圖汗職貢有年不忍其

後人骨肉分散靡所止居惻然垂照欲巴圖爾額爾克濟農羅卜

臧滾布阿拉布坦集居一處特降恩綸甚盛德也第此青海之地

各有分屬若使居天朝境內又恐厄魯特或有異言其阿喇克山

之旁亦屬狹隘乞 大君矜憐擇水草寬闊處安插一隅茲已遣

車齊克他賴堪布羅卜臧令於十月內至阿喇克山伏乞遣使往

會 上諭理藩院右侍郎拉篤祜一等侍衛文達爾等可與達賴

喇嘛使者同往召集巴圖爾額爾克濟農羅卜臧滾布阿拉布坦等相度伊等可以游牧之地指而與之仍會同提督孫思克將地之界限令伊標下官弁認記如巴圖爾額爾克濟農等因給地安插欲來謝恩則許之來達賴喇嘛使人欲來請安亦許之來否則給以廩餼而遣之其額爾德尼和碩齊等欲與巴圖爾額爾克濟農等一同游牧亦許之爾等可與彼定沿邊爲盜作亂之罰前巴圖爾額爾克濟農來覲時已自誓不復令屬下爲非其羅卜臧滾布阿拉布坦亦須嚴禁所屬兄弟既已完聚從此和睦安居儻再致流亡他往殊負朕歸併眷恤之意朕所以不憚諄切訓諭者亦以其先世恭順有年不欲令其子孫失所也其一傳諭之○丙申禮部題荷蘭國王奏請定進貢限期五年一次又貢船例由廣東進路但廣東路雖稍近泊船之地甚險福建路雖稍遠泊船之

處較穩嗣後進貢准由福建進路應如所請從之○丁酉以章欽

文爲河南巡撫

由江蘇布政使遷

○戊戌以舒淑爲左副都御史

由大理寺卿遷

○己亥諭刑部刑獄民命攸關聽斷雖貴精詳而案牘務無留滯

庶事得速竣民免株累向來凡月朔一二日及齋戒等期不理刑

名爾衙門一切奏章俱行停止因而案件間有停積恐聽審人犯

久候拖累覆覈事件遷延滋弊嗣後遇前項日期除循例不行刑

外其餘照常章奏事件仍行審理啟奏務期獄無稽緩案得早清

以副朕明慎用刑之至意又諭大學士等每月朔初二日及凡齋

戒日刑部所上常事照常發科刑戮重罪事關人命者勿發可併

數日章奏於齋戒畢發之或留中或發內閣者皆如之○以李光

地爲額外內閣學士

原任

○于故內閣學士牛紐祭葬○以吳拉岱

齊穡俱爲內閣學士

俱由內閣侍讀學士遷

○丁未

上御經筵

○戊申賜

荷蘭國王敕諭曰朕惟柔遠能邇盛代之嘉謨修職獻琛藩臣之大節輸誠匪懈寵賚宜頒爾荷蘭國王耀漢連氏甘勃氏屬在遐方克抒丹悃遣使齎表納貢忠盡之忱良可嘉尙用特降敕獎諭並賜王文綺白金等物王其祇承益勵忠貞以副朕眷欽哉○諭議政王大臣等向者羅利侵犯雅克薩尼布潮諸地戕我居民邊境騷然會諭鄂羅斯察漢汗來使尼果賚等撤回其眾自後竟不覆奏反在在侵犯肆行擾害意尼果賚未達前旨於察漢汗復令被擒羅利持書喀爾喀地宣諭之亦不覆奏因遣發官兵往雅克薩招撫羅利不戮一人令其頭目額禮克謝等持書歸去羅利聞我師言旋復回雅克薩築城以居朕思本朝頻行宣諭會未一答而雅克薩羅利又死守不去或尼布潮諸地阻隔前書未達或雅克薩羅利皆彼有罪之徒不便歸國俱未可知今問荷蘭國貢使

稱伊國與鄂羅斯接壤語言亦通其以屢諭情節備悉作書用兵部印付荷蘭國使臣轉發鄂羅斯察漢汗處收雅克薩尼布潮羅利於何處分立疆界各毋得踰越則兩界人民均得甯居不失永相和好之意察漢汗覆奏時令其使由陸路直來若陸路難通卽以來奏付荷蘭國代奏再依此作書發西洋國轉達之○吏部奏翰林官請照例外轉 上曰翰林官員內或有不善書法者或有不能撰講章者或有不能句讀通鑑者甚有以飲酒宴會爲事博奕爲戲者以讀書立品思副委用裨益國事者甚少今若依部議以道缺調用恐伊等登第之後未經敷歷驟任監司則無才之人反爲僥倖何所懲創應以學問不及者分別一二人降謫庶眾皆知儆著吏部翰林院學士再議尋吏部等衙門議覆翰林院侍讀詹事府庶子以下各官外轉道員例相應停止嗣後侍讀庶子以



下各官有外轉者應以同知運判提舉等缺補用從之○以劉鼎  
爲江蘇布政使由蘇松道遷○辛亥 上巡幸塞外啟鑾○是月免江

南沛縣雹災賦

八月辛未 上駐蹕烏爾格蘇台賜翁牛特喀喇沁王台吉等冠  
服銀幣有差○壬申 上回鑾○乙亥以正黃旗佐領索額圖爲  
領侍衛內大臣○裁雲南英武關土巡檢歸併鎮南州管理○丙  
子 上還京師○丁丑諭黑龍江將軍薩布素等今天時漸寒河  
流將結宜每事籌畫豫爲之備觀羅利復來雅克薩城必待援兵  
之至且冀我兵於流澌時撤回耳目前我兵雖掘壕防禦至隆冬  
冰合後船艦若何收藏馬匹若何飼秣敵兵來援若何撲滅勿令  
入城爾等其詳加籌畫密以奏聞尋薩布素等奏臣等懍遵諭旨  
已於城三面掘壕築壘壕外置木椿鹿角分汛防禦城西對江另

設一軍若截江之東西以泊船水險難停恐未流澌時江路有羅  
剌逸去尼布潮來援復派勦禦之兵於東西兩岸泊船備之離城  
六七里上流有港流澌時卽藏船於內另設一軍守護兼令堵尼  
布潮援兵至軍中馬匹有疲瘦者一半發黑龍江一面發墨爾根  
令駐彼盛京官飼秣得旨發墨爾根處之馬匹如交駐彼盛京官  
兵則更費食糧可令索倫總管洪吉等飼秣盛京官兵仍行遣還  
其發黑龍江之馬匹卽令黑龍江官兵飼秣○先是副都統博定  
請率築城官兵二百人進勦事下將軍薩布素等議至是薩布素  
等奏臣等統率二千一百人所在防禦兵力尙單得博定增兵前  
來殊有裨益 上因命博定精選築城及種地官兵二百人齎二  
月食糧速赴薩布素等軍前令其參贊軍務○戊寅詔釐定天下  
學宮崇祀賢儒位次○庚辰詔增孔林地十一頃有奇免其稅糧

○是月免湖廣興國通山崇陽通城浙江西安等九縣水災額賦有差

九月甲申 上幸玉泉山○庚寅諭戶部自古帝王撫馭九有軫念民依凡鞠謀生養爲計甚周猶以賜復蠲租爲布德行仁之要務朕嘉與海內元元共圖樂利弛征減賦時廩於懷惟頻渙恩施俾萬姓得霑實惠念直隸畿輔重地天下根本寬租之詔屢沛但順保永河較之畿南諸府差役倍多供億尤劇應加軫恤又湖南福建四川貴州地方昔年爲賊竊踞民遭苦累今雖獲有甯宇更宜培養以厚民生應一體蠲免用昭愷澤直隸順永保河四府及四川貴州兩省所有康熙二十六年應徵地丁各項錢糧俱著蠲免二十五年未完錢糧亦著悉與豁免湖廣福建兩省所有康熙二十六年下半年二十七年上半年地丁各項錢糧及二十五年

未完錢糧亦與盡行豁免爾部速行該地方通行曉諭務使人民均被恩膏以副朕愛育蒼生至意如有不肖有司官役借端蒙混及私行重徵者該督撫指名題參從重治罪如該督撫徇隱不行糾舉或經參奏或被告發定行一併從重治罪○調諾敏爲禮部尚書

由刑部調

○乙未以禧佛爲刑部尚書

由四川陝西總督遷

○己亥禮部題

朝鮮國王李焯遣使謝罪進貢方物應交內務府收貯 上曰朝

鮮國因謝罪進貢理宜不收但恐發還不惟齎送人役勞苦亦且驛遞騷擾可將此項准作年貢嗣後謝罪貢物著停止○予故廣西巡撫郝浴祭葬○庚子諭大學士等爾等職任朝廷重務豈可專爲一身一家之計古有詔旨既下大臣封駁之例今滿大學士凡有所言漢大學士惟唯諾諾並不辨論是非如此則劉正宗陳名夏之例具在學士等誠能各抒己見共相參酌事務豈致舛

錯今爾等諂媚大學士緘默不言以爲保身之計吳格塞卓靈阿之例具在至翰林院撰擬文章俱關要務今翰林撰擬不堪漢掌院學士漢大學士俱不改正誠恐改正一字卽爲終身之仇掌院學士畏懼翰林大學士畏懼六部此皆尸位素餐患得患失之所致也○辛丑禮部等衙門議覆朝鮮國王李焯奏陪臣鄭載嵩等具呈禮部飾詞巧辨蒙恩寬免嚴拏令臣自行處分今已將鄭載嵩等褫其官職依律定罪應如所議得旨鄭載嵩等本當依議處分但念係愚昧無知姑從寬免其革職發配著各降四級調用○工部尚書杜臻丁母憂令回籍守制○癸卯理藩院題厄魯特土哈爾台吉噶爾丹台吉等遣使互市 上曰厄魯特部落如噶爾丹等四大台吉應令來京互市其餘小台吉俱於張家口互市著爲定例○乙巳以圖納爲四川陝西總督由山西巡撫遷○丁未以陳廷

敬爲工部尚書

由左都御史還

○以馬齊爲山西巡撫

由布政使還

○己酉鄂

羅斯察漢汗遣使奏言

皇帝所賜之書下國無通解者及尼果

賚歸問之述

天朝大臣以不還逋逃根特木爾等騷擾邊境爲

辭近者下國邊民構釁作亂

皇帝遣師辱臨境上恭請察明作

亂之人發回正法除遣使議定邊界外先令米起佛兒魏牛高宜

番法俄羅瓦等星馳齋誓以行乞撤雅克薩之圍詳晰作書曉諭

下國 上諭大學士等鄂羅斯察漢汗以禮通好馳使請解雅克

薩之圍朕本無屠城之意欲從寬釋其令薩布素等撤回雅克薩

之兵收集一所近戰艦立營並曉諭城內羅利聽其出入毋得妄

行攘奪俟鄂羅斯使至後定議○庚戌以董訥爲左都御史

由吏部侍

還○辛亥禮部尚書沙澄以會推四川學道徇情爭論命原品休

致○免直隸武清文安保定水災賦有差

冬十月壬子朔 上幸玉泉山○皇子允祥生○丙辰調張士

甄爲禮部尙書由刑部調○丁巳 上幸南苑行圍○戊午調胡昇猷

爲吏部左侍郎管右侍郎事由戶部調○以布雅努爲山西布政使由

察使○理藩院尙書阿喇尼奏臣等於八月十六日召集喀爾喀

兩翼汗及濟農台吉等宣示 聖諭令其同歸於好色冷阿海台

吉等跪言曰我七旗喀爾喀向皆和好自羅卜臧肇亂以來互將

人民隱占是以蓄怒交惡今 皇上遣大臣使我等和睦安樂我

等不勝懼怖土謝圖汗之弟西地西里巴圖爾台吉跪言曰我兩

汗相惡俱係小人獻譏所致今使兩汗納忠言斥讒佞我竭力諫

諍自當言歸於好兩翼汗曰 聖意諄復所以開示愚昧者甚至

我等敢不祇遵臣等遂令兩汗及濟農台吉等於本月二十三日

檢選所屬才能寨桑六十餘人俱至噶爾賈西勒圖澤卜尊丹巴

胡土克圖前設立重誓兩翼互相侵占之台吉人民令各歸本土  
一切應結事件俱審擬完結仍令濟農台吉等設立重誓自今以  
往當永遠和協此皆 皇上非常威德所致謹以狀聞噶爾璽西  
勒圖亦以諭和事竣具疏陳奏得旨喀爾喀左右兩翼汗及濟農  
台吉等俱遵朕諭旨卽行設誓和睦可嘉該部院知道○庚申以  
胡昇猷爲刑部尙書由吏部左侍郎遷○壬戌 上自南苑幸玉泉山○  
轉蔣宏道爲戶部左侍郎調王日藻爲戶部右侍郎由刑部右調○乙丑  
上還宮○調馬世濟爲吏部右侍郎由兵部右調以張鵬爲刑部右侍郎  
由山東巡撫遷○工部議覆監修下河工部右侍郎孫在豐等奏疏濬  
之法開濬不如循舊築高不如就低因勢利導逐節疏通一由廟  
灣迎流而下約洩水十分之四一由天妃石碓順流而下約洩水  
十分之二一由白駒丁溪諸場分流而下約洩水十分之三其餘



一分由芒稻河導之入江至若串場一河綿亘范公隄一帶既爲鹽艘利涉又會諸引河之水傳送各場以出海口最爲關鍵而河身淤墊亟宜開濬上而徑河黃浦子嬰之間舊有通湖閘減水閘下而海口舊有各場諸閘並應修建使上下相應隨水消長以時節宣水得常流潮無內灌永杜淤墊之虞則旱潦無憂田澁不病臣等議孫在豐身在河干相度形勢既稱若者宜先濬若者宜後濬俟挑完之日改滾水壩爲閘座將串場河合鹽商挑濬並不必挑濬等處俱係詳審的確均應如所請速行挑濬又稱興工之日管理官員最要合將內外候補病痊降調等官有情願赴工者速往工所具呈揀用工成之日酌量議敘得旨如議改滾水壩爲閘座著孫在豐等會同靳輔確議具奏○調蔡毓榮爲兵部右侍郎以張集爲倉場侍郎

由左僉都御史遷

○壬申諭大學士勒德洪等鎮國

公哈爾薩爲人鑽營有玷公爵應將此公爵令伊兄六格襲替蘇

努雖係宗室其行事乃如人之奴僕在安親王及素額圖家諂媚

行走至在議政處但遇勢要之人發一議論伊輒唯唯聽從不敢

更有論說其阿順之態與家奴無異爾等將此旨傳諭哈爾薩蘇

努二人○革哈爾薩之子海青輔國公爵○丙子以薩弼圖爲山

西按察使由吏部郎中遷○戊寅諭大學士等人命關繫最重各省所審

錄強盜人命事件文致周密無隙可窺故閱之最難此等事皆深

宜詳慎○庚辰吏部議覆左都御史董訥奏參中書科掌印中書

托鼐將俸次在後之中書王緝植咨送考選查王緝植係原任左

都御史徐元文子壻顯有情弊據徐元文供王緝植並非子壻咨

送事並不與聞但如無營求之處托鼐豈肯將王緝植越次咨送

應將托鼐王緝植徐元文俱革職得旨徐元文寬免革職著降四

級調用餘如所議○雲南巡撫王繼文丁母憂命回籍守制○是月免直隸霸州寶坻甘肅歸德所保安堡屯地水災賦有差

十一月癸未以郎永清爲山東巡撫

由河南布政使遷

○己丑山西巡撫

馬齊陞辭

上諭曰爾見在居官好聲名亦佳但朕觀各督撫其

始未有不善旋即改轍爾若始終如一毋改其操則善矣○諭大

學士等爾等所進平定三逆方略四冊朕已覽畢其中舛錯頗多

如王輔臣爲馬鷓子當年隨經略洪承疇去時並無此號且朕記

其由雲南援勦總兵官授爲廣西提督今謂由陝西總兵官升任

竟未詳察至論贊中援宋太祖杯酒釋兵權事吳三桂等非宋功

臣可比乃唐藩鎮之流耳大學士等奏曰 聖見至當宋臣時在

輦下釋其兵權甚易豈可與諸逆久在邊陲者比 上曰平逆始

末阿蘭泰知之甚詳是非得失天下自有公論豈譽之而增高不

譽而加損也耶大抵記事欲得其實而已其謬誤處以籤標識者

爾等其酌改之○壬辰轉麻爾圖爲戶部左侍郎以賽弼漢爲戶

部右侍郎

由內閣學士遷

○禮部等衙門奏浙江提督陳世凱奏請令武

臣陪祀

文廟查見行事例

文廟春秋二季武官雖不陪祀但

康熙八年

皇上幸學武官二品以上亦令陪祀應照此例凡遣

官春秋二丁致祭

文廟武官二品以上並令陪祀其各直省府

州縣等學春秋二丁祭應令協領及副將以上照例以文左武右

行禮其致祭仍令地方正印官主祭從之○兵部奏自吳逆反叛

以來各省綠旗人議敘軍功者甚多此內不無匪人並未身赴軍

前黃緣假冒之事嗣後功加各官內除經制見任官與部准效用

官及題帶征勦並詳明報部帶去人員仍照例錄用其餘功加各

項官俱停其錄用從之○癸巳理藩院侍郎拉篤祜等奏臣等出

甯夏阿喇克山閱視地形得遇巴圖爾額爾克濟農約其在東大山北聽候宣旨於九月十二日在嘉峪關外得遇達賴喇嘛使者車齊克他賴堪布隨遣人召羅卜臧滾布阿拉布坦對曰蒙 皇上洪恩賜我等地方當卽偕諸大人往赴約會之地但我姊阿奴乃噶爾丹之妻聞率兵千人聲言往謁達賴喇嘛從此而過或中懷詭計襲我亦未可定不得不整力待之請卽於此地宣旨可乎臣等隨同車齊克他賴堪布宣旨訖羅卜臧滾布阿拉布坦回奏曰 聖上俯念臣祖鄂齊爾圖汗使臣兄弟完聚給以土地臣不勝權怵卽當遷至濟農所居一同游牧但正值冬月屬下人民散處使之遷移貧人牲畜少者難以度冬請俟來年草青時遷之本月二十三日臣等至東大山北令巴圖爾額爾克濟農跪宣旨畢臣等又謂巴圖爾額爾克濟農曰爾所請喀爾占布爾古忒空廓

爾俄壠巴顏努魯雅布賴噶爾拜瀚海等地方給汝游牧外自甯夏所屬玉泉營以西羅薩喀喇山背後至賀蘭山陰一帶布爾哈蘇台之口又自西甯所屬倭波嶺塞口以北奴渾努魯山後甘州所屬鎮番塞口以北沿陶蘭泰薩喇春濟雷渾希里等地西向至阿濟納河俱以離邊六十里爲界隨與巴圖爾額爾克濟農屬下達爾漢噶卜楚喇嘛波克寨桑及提督孫思克標下遊擊李本善等畫地爲界臣等又與巴圖爾額爾克濟農定議罰例蒙古如殺邊內之民不論幾人俱斬其妻子牲畜入官偷盜人民牲畜者爲首二人絞仍將妻子牲畜入官餘者罰以三九牲畜仍鞭一百其不爲盜而私入邊游牧者台吉則罰以三九牲畜寨桑等罰以一九牲畜平人則鞭五十外仍將所騎馬匹入官其攜帶家口牲畜入邊游牧者不論幾戶俱入官至民人往邊外伐木刈草蒙古有

奪其食物者不論幾人將所乘馬匹盡行改還民人仍鞭三十其屬下每犯一次並罰濟農五九牲畜俟羅卜臧滾布阿拉布坦來會之時將此項情節亦明告於彼其額爾德尼和碩齊亦須嚴禁毋使妄行竊盜又厄魯特胡土克圖之子噶爾賈多爾濟者亦係鄂齊爾圖汗之嫡孫應令與巴圖爾額爾克濟農等附牧 上曰

噶爾賈多爾濟既係鄂齊爾圖汗之孫應令其與巴圖爾額爾克濟農等一同游牧其拉篤帖等所定地界並嚴禁盜竊之例理藩院其移文督撫提鎮通行曉諭○乙未贈湖廣陣歿護軍校赫圖瓦爾達世職○丙申 御書學達性天額頌宋儒周敦頤張載程顥程頤邵雍朱熹祠及白鹿洞書院以長沙府嶽麓書院爲宋儒張栻朱熹講學之所一體給額並頒日講解義經史諸書○丁酉調石琳爲雲南巡撫由湖廣調以田啟光爲河南布政使原任雲南布政使○

以額爾黑圖爲內閣學士

由內閣侍讀學士遷

○己亥

上謁

孝陵啟鑿

○庚子 上謁

孝陵至

仁孝皇后

孝昭皇后陵奠酒○兵

部左侍郎楊雍建奏請終養允之○丙午 上出龍井關駐蹕攔

羊口西○己酉

上還謁

孝陵至

仁孝皇后

孝昭皇后陵

奠酒○是月免直隸玉田豐潤水災江南徐州六合沛蕭蝗災額

賦有差

十二月癸丑

上還宮

○丙辰命吏部侍郎薩海等督耕鳳凰城

地其前遣吉林烏喇黑龍江種地官易地巡課穫多者優敘○以

張汧爲湖廣巡撫

由福建布政使遷

○戊午調張可前爲兵部左侍郎轉

張鵬爲刑部左侍郎以趙之鼎爲刑部右侍郎

由左副都御史遷

○以張

英爲兵部右侍郎

由翰林院學士遷

○予臺灣殉難續順公沈瑞暨妻

鄭氏及拖沙喇哈番沈珽各祭葬○癸亥以鄭重爲左副都御史



由通政使遷

○禮部等衙門遵旨議覆 壇 廟陪祀文武官品秩禮

儀 上曰這所議妥當著如議凡祭祀時特遣御史監禮專以糾劾今觀御史不過左右顧盼聊以充數未嘗糾參且非特諸臣而已卽朕設有不敬處亦當舉奏也○丙寅福建提督張雲翼奏水師提督施琅於泉州公廨建立 御書碑亭各官不便行走得旨朕賜御書原以褒施琅之功榮寵其一家於伊家左右猶可立碑今乃於公所建立不獨張雲翼一人出入未便卽合省文武大僚亦皆震悚回避此特借端招搖該部嚴飭施琅不得於公所立碑○大學士等奏監修下河侍郎孫在豐與河道總督靳輔會議改滾水壩爲閘座之處俟黃河刷深之日再議又孫在豐等題先從海口石礎等處興工請敕河臣如遇水勢稍減卽將滾水壩盡行閉塞以便開濬下河 上曰頃郎中鄭都至京奏稱伊回時

卽行挑濬下河朕諭曰此事恐未能卽便興工今孫在豐等果如此具題其不能與靳輔抗明矣今若不閉塞滾水壩等口則下河一面挑濬上河一面放水何日方有成功若卽閉塞日後運河潰決則靳輔借以爲辭欲籌兩全之道實爲甚難然靳輔前曾啟奏築隄以束下河之水使之歸海此奏內有無閉塞滾水壩等口之語爾等卽會同九卿詳看如向欲閉塞今孫在豐修理下河又云不可閉塞可乎是日大學士等會同工部尙書侍郎等奏曰臣等與九卿查前靳輔于成龍會議疏通下河奏內欲將高郵州北小閘小隄俱行閉塞於高郵州南邵伯鄭南二處修造大石閘兩座等語今值寒冬非大修時又且孫在豐尙未興工此二人應俱令來京其滾水壩諸處應否閉塞令在九卿前各陳己見候 皇上親行詳詰裁定然後興工似乎有裨 上曰此下河決宜開濬斷

不可止孫在豐不必令其來京堵塞隄關之處孫在豐何敢輕言  
若日後上河決潰渠能任其咎乎孫在豐所請不過上河不放水  
耳假使靳輔治理下河不塞水口能於巨浸中從事乎令靳輔爲  
之必欲閉塞諸口令孫在豐爲之又云不可豈非有阻撓之意耶  
王熙等奏曰 聖諭誠然靳輔前奏欲將諸口閉塞今又云不可  
閉塞前後之言自相矛盾 皇上聖明且親歷河干洞見河形若  
召靳輔詳問自不得有所隱蔽矣 上曰依爾等所議召靳輔來  
京朕有面問之處○翰林院編修勵杜訥奏 皇上檢閱綱鑑大  
全綱目全編二書自康熙二十四年三月起至康熙二十五年十  
二月而竣臣恭侍左右仰見 睿照精深參稽詳切凡歷代興衰  
昔人得失一經 聖諭煥若典謨大義標新動關建極綬猷之至  
計片語居要必殫格物窮理之精思所有記注 聖諭伏望頒付

史館宣示來茲以發凍水所未詳補紫陽之弗逮得旨勵杜訥朝  
夕侍從勤勞可嘉所奏著禮部翰林院會同議奏行○戊辰諭戶  
部朕念切民依鞠謀生養欲使羣生樂利幹止甯成惟頻行減賦  
蠲租庶萬姓得霑實惠前念直隸順天永平保定河間四府差役  
繁多已免明年正賦比慮兵餉或有不敷畿南未行蠲免今聞此  
四府人民間有艱苦朕心深爲軫念著將眞定順德廣平大名所  
屬明年額賦一體蠲免○先是侍衛納爾泰於內大臣前首告兵  
部右侍郎蔡毓榮在雲南時侵沒逆藩吳三桂入官家財人口因  
伊奉差雲南恐致發露送銀八百餘兩蔡毓榮之子蔡琳在京時  
亦經送銀一百兩當時不卽行出首罪實難辭應聽處分舅舅佟  
國維等啟奏事下吏刑二部將蔡毓榮並子蔡琳革職鞫問上  
諭刑部尚書禧佛等蔡毓榮居官貪酷品行污穢伊恃財勢籠絡

人心內外無不周到得雲南城時吳逆家貲等物理應給賞兵丁蔡毓榮將珍奇財貨悉侵入私囊餽送大臣官員如此大惡之人若不加懲創何以使其餘儆戒爾等詳加嚴審務將情弊盡行察出又內務府奏正黃旗薩哈廉所管文定國首告蔡毓榮隱逆吳逆嫡孫女郭壯圖之媳占據爲妾並受逆黨胡永賓重賄釋放回籍等事下吏戶刑三部一併察審至是三部題奏蔡毓榮給送侍衛納爾泰銀八百餘兩及恢復雲南城得金二百兩銀八千兩將應入官之吳氏爲妾俱實胡永賓係吳逆同謀起事要犯蔡毓榮蒙混造入微員冊內報部釋放則得賄欺隱情弊亦實查蔡毓榮前任湖廣總督失陷城池蒙 皇上不卽加誅從寬優免復授以封疆重任不思效死贖罪反負國恩侵沒逆藩家財人口行賄請託受財縱犯罪惡莫大應擬立斬將所欺隱金銀照追入官吳逆

家口除孫女吳氏已故外俱應追取入官伊子蔡琳照以財行求例枷五十日鞭一百納爾泰受蔡毓榮父子銀兩因伊自首應免擬罪所得銀兩照追入官胡永賓已經釋放應免查議 上諭大

學士等蔡毓榮當日棄常德退回以致湖南被陷徐治都死守故彝陵僅存後大兵進勦恢復雲南蔡毓榮不過隨大兵行走並未建尺寸之功且董衛國攻取楓木嶺蔡毓榮方進辰龍關弄巧奪董衛國之功兵部利伊財物屢敘伊功甚屬愚昧且此案所議缺略更甚胡永賓爲何不令解京部臣之意以若提胡永賓未免葛延受累人眾今且交三法司覈擬具奏納爾泰著革職胡永賓著解京照例發落餘依議○己巳以張永茂爲福建布政使由廣西按察使遷○甲戌 上幸南苑行圍○己卯 上還宮○是月免江南靈壁縣蝗災賦○是歲朝鮮安南荷蘭吐魯番來貢朝鮮入貢者二

○人丁戶口二千三十四萬一千七百三十八田地山蕩畦地五百九十萬三千四百三十八頃六千七畝有奇徵銀二千七百二十四萬一百八十九兩有奇米豆麥六百九十一萬二千二百九十三石二斗有奇草二百二十九萬二千二百八十七束茶十五萬九千三百一十五引行鹽四百三十五萬六千一百五十引徵課銀二百七十六萬一千三百八兩有奇鑄錢二萬八千九百八十六萬九千八十有奇

東華錄

康熙三十九

臣王先謙敬編

臣周澗蕃恭校

康熙二十六年丁卯春正月戊子諭黑龍江將軍薩布素等自雅克薩城解圍以來聞軍士間有患疾者此皆屬滿洲精兵朕甚憫焉今特遣太醫院官二人齎藥前往治之至於羅利雖與我兵對壘但我兵攻雅克薩城從未肯誅戮其人如城中有患疾之羅利亦應聽其就醫使還彼國傳布德意○丙申大學士等遵旨覆奏臣等詳問靳輔開濬下河塞減水壩之處據云高郵州之南兩大減水壩自正月可塞至五月其三小減水壩自正月可塞至三月高郵州之北其壩亦有可塞之處惟高家堰之壩斷不可塞其應塞之處前與孫在豐會議時並未議出殊屬不合應將靳輔交與



該部議處

上曰開濬下河其要不在高郵州之壩惟在塞高家

堰之壩今不塞高家堰之壩止塞高郵州之壩何益之有 上召

問靳輔九卿問爾之言與朕所問有不同處否靳輔奏曰有一處

不同大臣云爾若堵塞淮水入黃河之口令其流入七州縣則下

河修理必致遲誤臣謂修理正河錢糧尙憂不足安得更有錢糧

堵塞無用之口且黃水強則流入淮河淮水強則流入黃河並非

人力所能禁止者臣若阻撓挑濬下河能逃國法乎湯斌奏曰今

雲梯關與前不同若塞高家堰之壩則淮水盡入黃河黃水無倒

入淮河之理從前河隄單弱不築減水壩則黃河必致潰決今隄

既高堅若塞隄壩使水歸一路則沙不停壅河身漸深今靳輔惟

恐黃河潰決於南岸毛城鋪等處築減水壩令黃河之水入洪澤

湖洪澤湖不能容又於高家堰築減水壩令入運河運河不能容

又於高郵州等處築減水壩令入七州縣七州縣之水無所歸不  
但七州縣之民被災二三年間黃水淮水及三十六湖之水並皆  
停蓄泛濫則漕運亦甚可慮今 皇上令堵塞高家堰之壩修理  
下河不止七州縣之民漸安生理卽漕運亦永受其益此臣據理  
而言似屬可行靳輔奏曰挑濬下河使積水入海雖云善策然下  
河旣濬恐海水倒灌可慮 上曰挑濬下河海水斷無倒灌之理  
今若將黃河南岸毛城鋪等處減水壩閉塞則黃河之水不入洪  
澤湖洪澤湖止有淮水則高堰隄可以暫塞一年挑濬下河方能  
成功爾等會同九卿再詳議以聞○喀爾喀土謝圖汗察罕車臣  
汗訥爾布及七旗濟農台吉等合奏請上 尊號不許○大學士  
等遵旨覆奏開濬下河應塞減水壩 上問靳輔曰黃河南岸毛  
城鋪一帶開壩可以閉塞否靳輔奏曰永塞不便可以暫塞一年

上曰閉塞此等閘壩水勢可減幾分靳輔奏曰春夏可減十分之四秋冬止減二分臣仰體 皇上愛民之心故議閉塞一年若黃河南壩永塞不惟淮水弱不能引入清河黃水發反灌入淮河

上曰淮水原不弱或恐河南等處水少以致淮弱若將高家堰減水壩堵塞則淮水自不弱黃水豈能逆入耶靳輔奏曰臣議將高家堰之古溝塘埂兩壩自正月閉塞至四月初一日開其餘四壩亦自正月閉塞至六月初一日開 上曰塞此六壩可無患否

靳輔奏曰五月以前猶可無患六月以後不可必矣 上曰欲開下河須塞上流若但塞高郵州之五壩不塞高家堰所謂不揣其本而齊其末於事何益靳輔奏曰前孫在豐止議高郵州未嘗及高家堰故臣亦止云高郵州等壩宜閉耳今 皇上所見最爲洞悉臣何敢欺隱高家堰之壩亦當如 聖諭閉塞也○辛丑諭工

部下河工程今年著止將高郵州大小壩及高家堰閘壩照新輔等所奏定限堵塞令孫在豐等挑濬海口其黃河南岸閘壩著於來年堵塞一年其高郵高家堰等閘壩既限期堵塞著孫在豐速備工料人夫自今年十二月興工挑濬下河勿致違誤○癸卯以圖爾宸爲禮部右侍郎由陝西巡撫遷○乙巳太子太傅禮部尙書武英殿大學士吳正治以老乞休允之

二月己酉朔以布雅努爲陝西巡撫

由山西布政使遷

盧崇興爲廣西按

察使

原任安徽按察使

○庚戌刑部等衙門會審蔡毓榮隱藏逆女貪取

逆財種種不法上背國恩應仍擬斬立決得旨從寬免其處斬籍

沒家產著枷號三箇月鞭一百並分家子發往黑龍江○辛亥調

伊桑阿爲禮部尙書

由兵部調

○壬子內閣學士郭棻綠事革職○癸

丑上大閱於蘆溝橋○甲寅以余國柱爲武英殿大學士

由戶部尙

書選○乙卯 上御經筵○以錢珏爲山東巡撫由順天府尹選○丙辰以

盧琦爲內閣學士由少詹事選○革刑部尙書禧佛左侍郎噶爾圖右

侍郎敦多禮職以宗人府題參正黃旗少詹事覺羅僧參失盜一

案審理失實故也○戊午調陳廷敬爲戶部尙書由工部調○庚申命

八旗都統副都統更番值禁城五門○都察院議覆原任刑部尙

書禧佛審蔡毓榮一案不秉公研訊律擬失當顯係徇庇禧佛已

經別案革職應枷號兩月鞭一百刑部尙書胡昇猷侍郎張鵬趙

之鼎敦多禮不嚴加審訊俱係徇庇應各降二級調用敦多禮已

經別案革職應將佐領降二級調用得旨禧佛著照部議完結後

發往黑龍江披甲效力贖罪敦多禮亦著發往黑龍江胡昇猷補

授刑部以來並無效力處照議降二級調用張鵬莅任未久免罪

趙之鼎從寬免調用著降二級留任○辛酉調佛倫爲刑部尙書

以阿蘭泰爲工部尙書

由左都御史遷

葛思泰爲刑部左侍郎

由內閣學士遷席

珠爲刑部右侍郎

由左副都御史遷

○壬戌以鄂爾多爲兵部尙書

由內務府

總管

○癸亥

上幸南苑行圍

○甲子九卿議覆給事中劉楷奏

請禁淫詞小說

上曰淫詞小說人所樂觀實能敗壞風俗蠱惑

人心朕見樂觀小說者多不成材是不惟無益而且有害至於僧

道邪教素悖禮法其惑世誣民尤甚愚人遇方術之士聞其虛誕

之言輒以爲有道敬之如神殊堪嗤笑俱應嚴行禁止○丙寅贈

永甯陣歿守備席豹官廕○丁卯 上幸玉泉山○以張玉書爲

刑部尙書

由原任侍郎遷

王日藻爲工部尙書

由戶部右侍郎遷

○以布喀爲山

西布政使

由陝西按察使遷

○戊辰以宋犖爲山東按察使

由直隸通永道遷

己巳內閣學士韓菼以病乞假允之○庚午以塞楞額爲內閣學

士

由甘肅布政使遷

覺羅舜拜爲左副都御史

由大理寺卿遷

○壬申戶部奏許

墅關監督桑額任內除徵收正額外溢銀二萬一千二百九十六兩零得旨設立權關原欲稽察奸宄照額徵收以通商賈桑額徵收額課乃私封便民橋以致擾害商民著該衙門嚴加議處關差官員理應潔己奉公照例徵收嗣後有不肖官員希圖肥己種種強勒額外橫徵致害商民亦未可定爾部通行嚴飭○癸酉以廖巨爲左都御史由盛京工部侍郎遷調張鵬爲戶部左侍郎管右侍郎事由刑部侍郎遷

調左

三月庚辰以李振裕爲內閣學士

由翰林院侍講遷

○禮部題請停天下

歲貢生廷試其中有情願入監讀書者該學起文送部到監肄業

至於舉人就教者亦免廷試具呈吏部照次補用允之○辛巳調

圖爾宸爲盛京工部侍郎

由禮部右調

○轉趙之鼎爲刑部左侍郎以王

國安爲刑部右侍郎

由福建總督遷

○以吳赫爲陝西按察使

由郎中遷

○乙

酉大學士等奏臣等遵旨傳諭九卿等集議應行應改事務諸臣

僉云 皇上夙夜孜孜勤求治理政務俱已全備寰宇已極昇平

並無應行應革事件前輔政大臣時各省皆有總督自 皇上親

政以來酌裁總督員缺惟設江南江西一總督廣東廣西一總督

雲南貴州一總督湖南湖北一總督四川陝西一總督福建浙江

一總督後將浙江福建總督缺改爲福建總督然浙江福建皆係

近海地方請仍改福建總督爲浙江福建總督似屬有益從之○

以顯八代爲禮部右侍郎由內閣學士遷○調王新命爲浙江福建總督

由江南江西總督○己丑以董訥爲江南江西總督由左都御史遷○以噶邇薩

爲甘肅布政使由郎中遷○庚寅以覺羅舜拜爲內閣學士由左副都御史遷

○翰林院掌院學士李光地以母病請假歸省得旨李光地准其

歸省俟伊母病稍愈卽來供職不必開缺○癸巳以王鴻緒爲左



都御史

由原任戶部侍郎遷

○乙未以傅拉塔爲左副都御史

由陝西布政使遷

○

以慕天顏爲漕運總督

由貴州巡撫遷

○己亥以魯超爲河南按察使

由

南淮揚道遷

○辛丑諭大學士等與孫在豐同往修河諸員未嘗留心

河務惟事圖利孫在豐以漢人不能約束若輩原任淮揚道高成美乃罷職之人今猶不赴京必與往修河工諸員串通妄爲河工事關緊要須與江南江西總督總漕總河會同商酌修理方克有成著交九卿議○癸卯九卿遵旨議覆 皇上軫念高寶七州百姓久罹水患特遣大臣挑治下河甚盛心也今所差司官便已懷私不聽侍郎孫在豐調度請敕下江南總督巡撫及總漕總河公同孫在豐監修庶無阻撓原任淮揚道高成美係降調之官乃淹留彼地行事不端實爲可惡應移文地方官勒令回京 上曰朕特頒內帑濟治下河原爲救民起見今國計非絀設錢糧不敷何

妨再請頒發聞差往各官初欲派之民間後又中止仍復按引派  
加鹽課是未嘗救民先已害民豈不大負朕之初意乎此事斷不  
可行著停止通行曉諭差往各官著撤回餘依議○大學士等遵  
旨議奏 皇上勵精圖治加惠黎元比年以來將各省錢糧履行  
蠲免民皆得所至如刑罰 皇上念及人命所關惟矜惟恤務期  
平允故天下無冤抑之民國家政事豈有闕失今畿輔地方雖雨  
澤愆期而山東河南山西等處雨澤應時有年可望臣等再三酌  
議見今政務實無可更改釐定者 上曰堯舜之世方可稱無闕  
失然兢兢業業不敢謂已治已安漢文帝亦古之賢主賈誼猶指  
陳得失直言切諫今但云主聖臣賢政事無闕豈國家果無一事  
可言耶况求言原屬要事無論智愚皆當各陳己見以備採擇始  
於政務有所裨益大小臣工宜各盡職業視國事如家事方副委

任之意今每部滿漢堂官各有六員其間任事者但一二人餘則隨眾署名而已卽如各部啟奏本章每日不過數件其中情節如漢侍郎等未必了徹設朕問之諒有不能對者朕觀今世之人專務逢迎諂媚鮮能直道而行且己不勤而每謂人爲惰己無能而每強人爲劣此不過徒工浮議耳何益之有○以馬世濟爲貴州巡撫由吏部右侍郎遷○丁未調熊一瀟爲吏部右侍郎由督捕調穆禮布爲

陝西布政使由郎中遷

夏四月辛亥諭吏部國家用人才優者固足任事然秉姿誠厚者亦於佐理有裨比部院中亦有一二才優之人所以未卽升擢者因其有才又能循分故久任之朕聽政有年見人或自恃有才輒專恣行事者思之可畏朕意必才德兼優爲佳若止才優於德終無補於治理耳○癸丑 上幸玉泉山○乙卯諭大學士等設官

分職原以爲民所在得一良吏則民遂其生今觀各官雖有品行  
清潔者但畏國法而然如直隸巡撫于成龍之眞實清廉者甚少  
觀其爲人天性忠直並無交游惟知愛民卽伊木旗王等門上亦  
不行走直隸地方百姓旗人無不感戴稱頌如此好官若不從優  
褒獎何以勸眾可令九卿集議于成龍前因九卿推薦朕始擢用  
若再有如此好官不拘大小亦令九卿保舉來奏○以超士麟爲

兵部督捕右侍郎

由江甯  
巡撫遷

○諭工部四川枏木多產於崇山懸巖

採取甚難必致有累土司且來京甚遠沿途地方亦恐滋擾著傳  
諭四川巡撫免其解送○丙辰大學士等奏九卿遵旨會議直隸  
巡撫于成龍實心任事並無勉強虛假之處應賜獎勵以勵官方  
其優加宮保之處出自特恩至督撫各官內如雲南貴州總督范  
承勳山西巡撫馬齊四川巡撫姚締虞居官皆優 上曰范承勳

等居官果善但伊等尙有勉強之意于成龍則出自誠心毫無瞻顧今人不往來大臣之家則恐其意有不悅如于成龍介然自守無所交游爲大臣者其柰于成龍何著加太子少保銜以爲廉能稱職者勸○丁巳以蔣寅爲貴州布政使

由雲南按察使遷

○己未諭大

學士等爾等纂修明史曾參看前明實錄否史事所關甚重若不參看實錄虛實何由悉知他書或以文章見長獨修史宜直書實事豈可空言文飾乎如明代纂修元史限期過迫以致要務多漏且議論殊乖公正俟明史修成之日應將實錄並存令後世有所考據從來論人甚易自處則難若不審己之所行而徒輕議古人雖文詞可觀亦何足道朕嘗博覽羣書於古之聖君哲后未敢漫加評騭也○予故漕運總督徐旭齡祭葬又加祭一次諡清獻○壬戌命大學士勒德洪等同三法司清理刑獄○甲子以田雯爲

江蘇巡撫

由鴻臚寺卿遷

柴望爲廣東布政使

由湖南按察使遷

○庚午諭刑部

等衙門凡各省解送京城及京師解發各省人犯有解役中途陵虐及教唆犯人於沿途搶奪者甚至有將犯人拷打致死者其所犯之罪不至於死而陵弱拷打以致斃命殊爲可惡爾部會同督捕衙門定議條例以聞尋議覆凡解部及遞解外省各項犯人遵恩詔計程給與口糧嗣後凡籤差官役遣有家產正役押發沿途官員詳查有無解役勒捐拷打之處如或有之地方官卽將解役懲治若拷打致死地方官申報督撫嚴審從重治罪如有解役唆教人犯通同搶奪者以光棍例治之其在中途患病者原解卽報地方官驗明出結如未取患病印結途中死者以死者之多寡名數分別治罪永著爲例從之○辛未裁雲南復設左右二衛及平彝楊林等衛都司一守備八千總九經歷七教授一○壬申以許

宏勳爲雲南按察使

由陝西  
禮道遷

○癸酉諭大學士等聽政之時科道

侍班言官自恐失儀心切畏懼以致條奏者甚少凡啟奏官員果有失儀朕自降旨或其人自爲檢舉科道侍班罷之誠是且科道官多起自疏遠進退周旋未經嫻習朕欲以其建言爲要務雖有小過朕亦不計也其宣旨於九卿詹事科道此後科道侍班其已之○乙亥宗人府奏平郡王納爾都打死無罪人羅米又折楊之桂菩薩保二人手足應革王爵監禁得旨納爾都著革去王爵免其監禁○准福建臺灣府鄉試另編字號額中一名從陸路提督張雲翼請也

五月己卯以鄭端爲湖南按察使

由陝西涼  
莊道遷

○庚辰詔曰朕統御

天下念切民生夙夜圖治罔敢少懈邇來歲每不登民食寡乏今茲仲夏久旱多風陰陽不調災孰大焉朕用是靡甯減膳撤樂求

言省過齋居默禱雖雨澤溥降尙未霑足皆因朕之涼德不能上格天心茲特沛寬仁務崇惇大罷營建恤貧窮釋淹繫政令有不便於民者更之罪非常赦所不原者咸赦除之○轉丹岱爲兵部

左侍郎調拉篤祜爲兵部右侍郎以吳拉岱爲理藩院右侍郎

閣學士遷

○戊子

上召尙書陳廷敬湯斌侍郎徐乾學少詹事耿介

侍讀學士高士奇德格勒侍講學士孟亮揆侍講徐元夢論德徐

潮中允徐鼎炎編修熊賜瓚勵杜訥等至 乾清宮內考試 上

閱諸臣試卷畢諭曰朕政事之暇惟好讀書始與熊賜履講論經史有疑必問樂此不疲繼而張英陳廷敬等以次進講大有裨益朕從來不輕評論古人卽如明史一書朕亦不遽加論斷然評論古人猶易若評論時人更難如德格勒每評論時人學問朕心以爲不然故召爾等面試妍媸優劣今已判然總之人之學問原有



一定分量真偽易明若徒肆議論則不自量矣○辛卯停本年秋  
決○壬辰建周公廟碑 上親製文 御書勒石文曰世運代嬗  
隔越千載則必有神哲挺生其間以承大統以作名世惟公體上  
聖之質紹祖考之德孝友篤仁左右甯王厥勳爛矣及乎負展能  
以勤勞寅恭惇大忠信之道翼贊其君太和洽而頌聲作焉夫功  
莫大於致治綏邦業莫隆於制禮作樂公身兼數器開物成務其  
龐鴻炳燦之烈既已載於詩書志諸史冊至於繫爰辭定官禮撰  
爾雅出言爲經又何博奧難窮也昔孟子論列古帝王至於公曰  
兼三王施四事而韓愈亦歷數堯舜禹湯文武以至公蓋道統之  
傳如此豈僅以治理之彰彰者與遙想風徽官公遺嗣俾昭世澤  
於無窮既命有司新公廟貌希慕之餘勒石頌德而繫之以詩詩  
曰遂古民樸混混茫茫列聖經綸肇軒迄商敘厥倫紀賁以采章

公監二代揆時立制有因有除禮明樂備體國經野成理萬彙集  
武之勳紹文以孝代成誠民並孔立教爲子爲臣是則是倣宗邦  
綸歷忠厚所貽貞珉載鐫作頌致思鳧繹同時億禩爲期○建孔  
子廟碑 上親製文 御書勒石文曰朕惟道原於天宏之者聖  
自庖犧氏觀圖書象闡乾坤之秘堯舜理析危微厥中允執禹親  
受其傳與湯文武周公遞承其統靡不奉若天道建極綏猷暨乎  
尙矣孔子生周之季韋布以老非若伏羲堯舜之聖焉而帝禹湯  
文武之聖焉而王周公之聖焉而相也巋然以師道作則與及門  
賢哲紹明絕業教思所及陶成萬世伏羲堯舜禹湯文武周公之  
統惟孔子繼續而光大之矣聞嘗誦習詩書之所刪述大易之所  
演繫春秋之所筆削禮樂之所修明本末一貫根柢萬有殆與覆  
載合其德日月並其明四時寒暑協其序焉故曰仲尼之道一天

道也朕敬法至聖景仰宮牆嚮往之誠弗釋寤寐歲甲子十有一月時邁東魯躬詣曲阜展修祀事復謁聖墓循撫松栝儀型在望僂乎至德之親人也朕忝作君啟牖下民深惟夫子師道所建百王治理備焉舍是而圖邇隆曷所依據哉因勒文於石彰朕尊崇聖教以承天治民之意系以辭曰遐哉三五維辟之式於皇尼山師道允植天畀木鐸覺彼羣生百行以正六籍以明賢邁唐虞聖則河洛綏和動來文博禮約鳳衰雖歎麟德感祥學昌洙泗統歸素王炎漢崇儒少牢用饗厥後賢君高山是仰予懷至聖莅彼東方音徽云邈道德彌光鬱鬱瑩林峩峩祠殿企慕安窮羹牆如見泰岱匪高東海匪深敬揚懿軌終古是欽○建孟子廟碑 上親製文 御書勒石文曰自王迹熄於春秋聖人之道或幾於泯滅卒之晦而復明歷千百世而不敝者恃有孔子也孔子沒百有餘

年浸假及於戰國楊墨塞路禍尤烈於曩時子輿氏起而闢之於  
是天下之人始知誦法孔子率由仁義斯道之有傳至於今賴之  
是以後世學者如韓愈蘇軾之徒咸推其功以配大禹而閩洛之  
儒咸遵爲正學之宗傳於戲盛已夫洪水之禍止於人身已爾楊  
墨之禍隱然直中於人心不有孟子使楊墨濫觴於前釋老推波  
於後後之人雖欲從千載之下探尼山之遺緒其孰從而求之因  
推述厥義刻文於石俾揭於鄒之廟其詩曰尼聖既往覓矣音徽  
後百餘歲聖緒浸微尙異實繁楊墨競煽陷溺之禍酷於昏墊惟  
子輿氏距彼放淫以承先聖以正人心述舜稱堯私淑孔子正學  
修明百世以俟不有是者斯道孰傳宇宙晦寤萬物狂悞我讀其  
書曰仁曰義遺澤未湮聞風可企嶽嶽亞聖巖巖泰山功邁禹稷  
德參孔顏刻石茲文於祠之下誦烈揚休用告來者○以多奇爲

內閣學士

由翰林院侍讀學士遷

○癸巳以貝子納爾圖襲平郡王寵寶襲

順承郡王○刑部左侍郎趙之鼎以疾請假回籍允之○丁酉

上素服詣天壇祈雨出入西天門皆步行是夜雨○辛丑左副

都御史徐元珙奏祀典所載致祭北海尚沿宋明舊制於河南懷

慶府係在京之南於義未合況北嶽已改祀渾源州則北海應請

改祀於混同江庶方位允協下部議行○命宋儒張載後裔世襲

五經博士○癸卯轉王國安爲刑部左侍郎以薛柱斗爲刑部右

侍郎

由安徽巡撫遷

○甲辰免湖南去年額賦並今年明年額賦之半○

是月免直隸豐潤縣水災額賦十之二

六月辛亥以楊素蘊爲安徽巡撫

由順天府尹遷

○庚申改貴州大定

府爲大定州○戊辰吏部議准雲南貴州總督范承勳奏貴州所

屬十五衛十所請分晰裁改偏橋衛裁併施秉縣興隆衛裁併黃

平州移州治於衛治新添衛裁併貴定縣移縣治於衛治貴筑貴  
前二衛裁去改設貴筑縣鎮西威清二衛赫聲威武二所裁去改  
設清鎮縣平壩衛桑遠所裁去改設安平縣安南衛裁去改設安  
南縣定南所裁併普定縣普安衛裁併普安州安籠所裁併安籠  
廳敷勇衛修文濯靈息烽干襄四所裁去改設修文縣永甯衛普  
市所裁去改設永甯縣畢節赤水二衛裁去改設畢節縣烏撒衛  
裁併威甯府從之○乙亥轉徐乾學爲禮部左侍郎調張英爲禮  
部右侍郎

由兵  
右調

臣 王先謙敬編

臣 周潤蕃恭校

秋七月癸未以成其範爲兵部右侍郎

由太常寺卿遷

○贈故太醫院院

使加通政使銜馬之俊爲禮部侍郎予祭葬○戊子先是喀爾喀

土謝圖汗奉 上諭偵探鄂羅斯分界使臣消息至是奏鄂羅斯

遣使請和已抵臣境 上命薩布素等統率官兵乘天時未寒還

至黑龍江墨爾根修整器械休息馬匹以度隆冬仍於要地嚴設

斥堠並以鄂羅斯遣使請和撤還大兵之故曉諭雅克薩城內羅

刹知之○辛卯刑部奏浙江民張遊叩闕請發與該撫審理 上

諭大學士等此案若交與該撫審理豈肯將實情明白審出著刑

部擇賢能司官往審近見奉差審事司官多不明晰此皆瞻徇各

部院堂官不敢結怨耳大凡督撫無不與部院堂官營求結納分樹門戶若司官與督撫相悖卽結怨於堂官尙能保其職乎部院堂官各援引親戚朋黨營求凡員缺未出之先其人豫定及會推時惟贊揚援引而從公推擬者甚少又有爲司官筆帖式時所行貪婪至於大位僞稱清廉者若此居心深可鄙恥今部院官員亦稍知更改若循此而行固善儻仍蹈前轍貪汙不悛是棄其身也雖或傲倖苟免於刑鬼神豈肯宥耶○壬辰予故太子太傅文華殿大學士宋德宜祭葬諡文恪○甲午諭大學士等馬哈達補授都統以來凡咨補官員皆有情弊著將都統並所得世職俱行革去發往黑龍江效力○乙未轉沙賴爲工部左侍郎以傅拉塔爲工部右侍郎由左副都御史遷○丙申以阿山爲左副都御史由通政使遷○庚子禁八旗喪葬宴會踰制者○壬寅上幸南苑行圍是日回



宮○丙午以黨愛爲甘肅按察使由郎中遷○大學士等奏戶部請裁公費 上曰目下國計充裕所爭不在於此况貪官需此以資生者甚多豈可盡裁著仍照見行例行

八月丁未朔禮部以順天鄉試同考官開列知縣等請旨 上曰同考用十六員此奏內進士知縣止有十人若應試之人豫擬此十人必爲試官有所鑽營則作弊更易著將員外主事以下小京官及知縣守部進士一併開列著爲令○命武臣副將以上官員丁憂參將以下官員在任守制從山西巡撫馬齊請也○戊申

上御經筵○己酉 上巡幸塞外啟鑾○癸丑 上駐蹕博洛和屯行圍○甲戌 上還次博洛和屯賜喀喇沁翁牛特王台吉等銀幣有差○乙亥 上駐蹕宜蓀畢喇行圍○是月免山西沁州

雹災賦

九月己卯 上還宮○壬午以李之芳爲文華殿大學士由吏部

○甲申調科爾坤爲吏部尚書由戶部調○丁亥京師地震○以翁叔

元爲內閣學士由少詹事○戊子調陳廷敬爲吏部尚書由戶部調○調佛

倫爲戶部尚書以廖旦爲刑部尚書葛思泰爲左都御史轉席珠

爲刑部左侍郎以塞楞爲刑部右侍郎由內閣學士遷○乙未大學士等

查江南七府陝西全省應免錢糧共計六百萬兩有零亘古以來

未有蠲免如此之多者臣等因爲數太多不敢遽議 上曰朕念

切民生卽多蠲亦所不惜爾等擬諭旨來奏○丙申調王日藻爲

戶部尚書湯斌爲工部尚書由禮部調○以徐乾學爲左都御史由禮部左

侍郎遷○庚子喀爾喀土謝圖汗戴青墨爾根台吉遣使奏言噶爾

丹書至我等曾遣使致覆本意終不釋然且喀爾喀之在厄魯特

處者及厄魯特之向與喀爾喀通好者俱言噶爾丹分南北兩路

來攻喀爾喀右翼人等除扎薩克圖汗及得克得黑戴青台吉之外餘俱言噶爾丹興兵是實我界上人等驚惶屢促出兵赴彼應敵是以率兵起行再去年盟誓時扎薩克圖汗之情形非特尙書阿喇尼見之他人亦盡知之彼見今與厄魯特杜噶爾阿喇布坦台吉一處遊牧視其情狀恐屬窺伺爲此馳奏得旨著議政王大臣會議安親王素諳蒙古事宜亦令與議尋議覆厄魯特喀爾喀俱係本朝職貢之國應遣敕令其罷兵同歸於好仍敕達賴喇嘛令其遣使諭令罷兵從之賜噶爾丹敕曰據喀爾喀土謝圖汗奏稱厄魯特內向遊牧兩路來攻我界上人等屢請赴彼故出兵迎之等語朕統御宇內無分中外爾厄魯特喀爾喀兩部落若果互相殘害朕心大不忍焉會於康熙十六年檄諭爾等務期共相和好且爾噶爾丹博碩克圖汗累世恭順職貢有年如果舉事無不

奏聞於朕者因道路遼遠眞僞難明朕向未之深信或不遲之徒  
兩地構煽亦未可定爾兩部落如果興兵必有一方至於敗亡不  
但重負朕向來一視同仁之至意羣黎之死亡離散朕心深爲憫  
惻敕書到日卽爲息爭修好則爾恭順之心朕實嘉之已敕諭土  
謝圖汗令其罷兵矣特諭又賜土謝圖汗及達賴喇嘛敕略同○  
甲辰轉張英爲禮部左侍郎以王鳳昌爲禮部右侍郎由原任詹事遷○  
乙巳以凱音布爲內閣學士由通政使遷○是月免山東博興水災賦  
冬十月戊申以王遵訓爲左副都御史由太常寺卿遷○己酉 上幸南  
苑行圍○特准順天鄉試浙江錢塘縣監生查嗣韓福建侯官縣  
貢生林文英五經中式○癸丑 上巡幸畿甸啟鑾○丁巳以宋  
犖爲江甯布政使由山東按察使遷○裁京通巡倉御史○己未賜直隸  
巡撫于成龍 上乘黃鞍馬一匹銀一千兩○庚申湖南巡撫張

汧奏參上荆南道祖澤深勒詐婪賊十二款枝江縣知縣趙嘉星  
私派殃民五款通山縣知縣邢士麟才短誤公請分別革職究擬  
得旨這所參著刑部右侍郎塞楞額前往察審○壬戌諭大學士  
王熙等鄉試爲掄才大典出題理宜詳慎今年鄉試主考朕未盡  
知於開列中酌量分遣今覽各省所進題名錄其題目多有未當  
如福建三場策問臺灣事宜一道於地方情形事勢毫未通曉乃  
茫昧命題殊爲悖謬其餘各省亦未盡當爾等將各省呈覽題目  
及題名錄詳加檢閱若有悖謬最甚者察出參奏於是察看福建  
雲南河南三省第三場策問命題詞義多有未當均屬悖謬部議  
主考王連瑛等分別降級調用從之○大學士等奏前總河靳輔  
奏稱高家堰之外再築重隄請停丁溪等處工程奉旨著問巡撫  
于成龍今于成龍覆稱挑下河有益於民若照靳輔之奏修理則

民反受其害 上曰挑濬此河原欲有益七州縣生民靳輔奏稱

高家堰等處築隄以爲屯田可獲百餘萬錢糧朕從利益民生起

見非爲錢糧也此挑河關繫緊要著戶部尙書佛倫吏部侍郎熊

一瀟給事中達奇納趙吉士會同江南總督總漕確勘議奏○子

故原任刑部尙書魏象樞祭葬諡敏果○甲子 上還京師○諭

大學士等今當軍政之年聞直隸各省提鎮歛取兵丁餽送兵部

此等情事朕不傳旨指明然亟應禁絕又聞每年奏銷兵馬錢糧

冊不遵定規歛取兵丁餽送該部此皆勒索於軍民者也其弊亦

宜永行禁止可傳諭兵部○以熊一瀟爲工部尙書由吏部右侍郎遷

以王樸爲山東按察使原任雲南按察使○戊辰諭大學士等侍郎拉篤

祜宜以武職用著解 上遇有副都統員缺卽行補用左副都御史

舒淑昏庸亦著解任交與該王爲護衛○庚午調張鵬爲吏部左

侍郎管右侍郎事

由戶左詢

○辛未諭大學士等凡人之行莫先於孝

近者漢軍居父母之喪親朋聚會演劇飲酒呼盧鬪牌儼如筵宴毫無居喪之禮至孝服鞍轡等類所用素帛皆異常華美喪禮止當服用粗惡豈宜華美耶居喪演劇滿洲所無漢人亦未有特漢軍爲然耳百行以孝爲大如此所行以爲孝道其他又何足觀也又漢軍外官赴任每借京債整飾行裝務極奇麗且多攜僕從致債主抵任索逋復謀贍僕從衣食勢必苛斂於民以資用度且親朋債主疊往任所請託需索不可數計是官雖一人實數人爲之以致朘削小民民何以堪又漢軍外官不能騎射乃自稱行獵多帶鷹犬借宿村莊滋害於民禽獸本在山野豈在村耶又漢軍服用多僭越非分終日羣居以馬弔飲酒爲樂此等物力從何而出有非苛取諸民者乎漢軍習尚之惡已至於極如原任總兵諾邁

原任提督哈喇庫祖永烈等於任所多買良民帶歸原任總督張長庚原任巡撫張德地韓世琦等皆貪婪虐民居官甚劣今著漢軍都統副都統等凡有居喪演劇飲酒呼盧鬪牌者照賭博例嚴行禁止在外漢軍官員任所有親朋債主前往請託需索貽累小民者亦令查訪指名題參朕此諭旨總爲敦厚風俗陶淑人心而起使漢軍居官者皆如總督范承勳巡撫于成龍之善朕又何諭之有此旨令徐廷璽傳諭○壬申以禪布爲兵部右侍郎由內閣學士遷開音布爲左副都御史由光祿寺卿遷○都察院奏商人楊國清等捐送柁木日久未收應將工部堂司官降調 上曰阿蘭泰傅拉塔在任未久傅拉塔居外任頗優俱免調用降級留任沙賴飲酒呼盧陳一炳曠職無能俱著革去侍郎餘依議○乙亥以王遵訓爲戶

部右侍郎

由左副都御史遷



十一月戊寅轉孫在豐爲工部左侍郎以徐廷璽爲工部右侍郎

由內閣學士遷

○己卯轉傅拉塔爲工部左侍郎以伊爾格圖爲工部右

侍郎○以趙山爲內閣學士

由翰林院侍講學士遷

○庚辰以徐誥武爲左

副都御史

由順天府府尹遷

○壬午吏部議覆左都御史王鴻緒奏參廣

東巡撫李士楨貪污不法年老昏憤各款除事在赦前及款無確

據者無庸議外李士楨年六十九歲昏憤是實應照年老例休致

從之○癸未以石文桂爲內閣學士

由內閣侍讀學士遷

○予故工部尙書

湯斌祭葬○乙未諭大學士等近見支用修造等項奏銷錢糧時

該部不准駁回者甚多此等奏銷屢行駁回官員未必捐彙補給

亦止派取民間耳如此則百姓愈苦向因需用孔亟故奏銷者未

卽准行今公帑並非匱乏時奏銷案件不必駁回卽應完結此等

事不行駁回在官員既可省案牘而於百姓尤大有裨益也可傳

諭九卿詹事科道○諭凡參劾貪官其受賄作弊之處因未曾親覩無所憑據畏縮而不行參劾者甚多今間有彈章亦止據風聞參劾耳豈有身與之通通受賄作弊而願肯參劾之耶向者原有風聞糾彈之例輔政大臣停止今再行此例貪官似有傲懼若有挾讐參劾者審明果係挾讐自有反坐之典在可傳諭九卿詹事科道○丙申 太皇太后聖體違和 上在 慈甯宮侍疾親嘗

湯藥晝夜不離左右傳諭內閣非緊要事勿得奏聞○丁酉以朱

宏祚爲廣東巡撫由直隸守道遷○辛丑免江蘇陝西明年額賦今年未

徵者並除之○壬寅諭刑部朕侍奉 太皇太后朝夕承歡祇遵

慈訓竭誠奉養今者 聖躬偶爾違豫朕夙夜滋懼寢食靡甯

仰冀 上天眷顧俯垂默佑惟思好生以迓 天庥寬大以延遐

壽所有內外問刑衙門見監重辟人犯除十惡死罪及貪官光棍

不赦外其餘已經奉旨監候死罪重犯概行減等發落以昭朕祈

天永佑至意○癸卯吏部議覆左都御史徐乾學奏參江西巡撫安世鼎才守俱劣久尸厥位應照不謹例革職得旨安世鼎著革職布政使張所志係安世鼎同城之官巡撫科派營私必與布政使通同作弊布政使果能清正巡撫豈能獨自妄行張所志素行不謹有玷官方亦照不謹例革職○甲辰諭大學士等自太

皇太后聖體違和以來多方醫治罔克奏效病勢漸增甚爲可慮朕夙夜憂懼茲欲躬詣郊壇虔行禱祀保佑太皇太后慈躬

和豫永獲康甯可將朕意傳示九卿九卿等奏曰皇上至孝超越萬古太皇太后違和皇上朝夕在慈甯宮席地奉侍親

調藥餌寢食俱廢聖孝之誠必當感格穹蒼臣等愚見似不

必詣壇致祭天心自爲默佑大學士等轉奏畢復諭曰自

太皇太后違和以來朕在宮中無日不虔潔精誠默行祈禱乃  
太皇太后聖體大漸似無一分可以冀望矣如稍有望之機亦  
不敢起躬禱 天壇之念今竟毫無冀望何計可施惟有竭抒誠  
悃叩祈 上天之眷佑耳並非沽取虛名徒事粉飾爲也皇皇  
上天其可欺乎將此諭旨向諸臣傳示之○禮部奏請擇齋戒告  
祭日期 上傳諭諸臣曰朕在宮中每日齋戒可卽於明早步行  
恭祭祈禱○禮部左侍郎額星格理藩院左侍郎喇巴克緣事革  
職○是月免江西萬載等七縣旱災額賦有差

十二月乙巳朔 上率諸王貝勒貝子公及文武官員等步詣

天壇致祭 上親撰祝文曰嗣天子臣敢昭告於 皇天上帝曰

臣仰承 天佑奉事 祖母太皇太后高年荷庇藉得安康今者

疹患驟作一旬以內漸覺沈篤旦夕可慮臣夙夜靡甯寢食捐廢

虔治藥餌徧問方醫罔克奏效五內憂灼莫知所措竊思天心仁愛覆幬無方矧臣眇躬夙蒙慈養憶自弱齡早失怙恃趨承

祖母膝下三十餘年鞠養教誨以至有成設無祖母太皇太

后斷不能致有今日成立罔極之恩畢生難報值茲危殆方寸憤迷用敢潔蠲擇日謹率羣臣呼籲皇穹伏懇憫念篤誠立垂

昭鑒俾沈疴迅起遐算長延若大數或窮願減臣齡冀增太皇太后數年之壽爲此匍伏壇下仰祈洪佑不勝懇禱之至讀

祝版時上涕淚交頤陪祀諸王大臣等無不感泣祭畢上卽

詣慈甯宮侍疾○己酉以王業興爲江西布政使由四川按察使遷○

壬子以席爾達爲禮部左侍郎由太常寺卿遷多奇爲禮部右侍郎由內閣學

士○甲寅內閣及各部院衙門官員具奏公請皇上少節憂勞

上曰朕自太皇太后違豫以來心懷憂慮日侍左右檢方調

藥親視飲饌

太皇太后甯憇之時朕隔幔靜俟席地危坐一聞

太皇太后聲息卽趨至榻前凡有所需手奉以進因此晝夜不能少離 太皇太后屢有慈旨命朕回宮少宜自愛朕念幼蒙

太皇太后撫養教訓三十餘年罔極深恩難以報答今見病體依然五內焦灼莫知所措朕躬寢處何暇顧計覽奏具見大小臣工愛君誠悃但當此時不竭盡心力少抒仰報之忱異日雖欲依戀

慈闈豈易得耶所奏已知之○以拜禮爲內閣學士

由內閣侍讀學士遷

○丙辰諸王貝勒貝子公內大臣大學士尙書侍郎侍衛等詣

慈甯宮門跪奏請 皇上問一回宮稍爲休息得旨 太皇太后

病勢漸覺沈篤朕心憂灼片刻難離朕卽回宮心亦不安所奏已

知之○丁巳以興永朝爲四川按察使

由廣西蒼梧鹽法道遷

○戊午以王

騰爲江西巡撫

由太常寺卿遷

○乙丑以額爾黑圖爲理藩院左侍郎

由內

閣學  
士遷

○御史陳紫芝奏參湖廣巡撫張汧任未久黷貨多端凡所屬地方鹽引錢局船埠等無不搜括甚至漢口市肆招牌亦按數派錢當日保舉之人必有賄屬情弊請一併敕部議處得旨張汧著革職所參各款著直隸巡撫于成龍山西巡撫馬齊左副都御史開音布馳驛前往提拏究擬具奏○奉差湖廣審事刑部右侍郎色楞額奏湖廣巡撫張汧所參上荆南道祖澤深婪贓款內得枉法贓金七兩銀四十兩是實枝江縣知縣趙嘉星私派款內得銀四百二十兩是實祖澤深趙嘉星俱應革職擬絞監候秋後處決其通山縣知縣邢士麟到任一月並無才短誤公之處應毋庸議巡撫張汧將邢士麟誤參應降一級調用原揭布政使胡戴仁按察使丁煒等各降二級調用得旨所審未當著于成龍等嚴加究擬具奏色楞額著嚴加察議○諭大學士等科道職任糾參

張汧貪婪無人敢言陳紫芝獨能彈劾甚爲可嘉著傳諭吏部卽令內升以示鼓勵○戶部尙書佛倫等查看河工回奏河臣靳輔奏請修築高家堰重隄束洪澤湖水盡出清口並黃河兩岸立閘分洩黃水而撫臣于成龍又奏下河宜挑不宜停重隄宜停不宜築彼此意見不合臣等會勘上下河道知高郵等七州縣水患皆因洪澤湖水從減水壩流入下河以致七州縣民田被水淹沒故治高郵城東隄減水壩流入下河以致七州縣民田被水淹沒故治下河必先塞上流使上流之水不得東注下河則保守高家堰水出清口自爲第一要著臣等閱視高家堰地勢應如河臣原議史家店以南石隄以東築一月隄使六壩所減之水由重隄以內流出清口自不致衝突堰隄但洪澤湖之水流入漕河漕隄關繫緊要宜行減洩應將淮安以北五叉河開開濬引水由草灣入海至



淮安寶應澗河等處亦應開濬引水由射陽湖達廟灣入海其高郵城東隄五座減水壩係下河水患之源今淮安府南北既經開濬此處俱應堵塞黃河兩岸仲家莊草灣等處建石閘三座分洩黃水入海仍照原議外惟安東縣五里墩建閘洩水由鹽河入海恐開閘之水逼近安東實屬危險應將石閘移建城東再看得下河形勢見在流通今既堵塞上流盡注清口則下河水勢自然漸減應將白駒丁溪草堰三口各工盡行停止其修築月隄並澗河等處開濬建閘所需錢糧應令河臣確估題請得旨九卿詹事科道會議具奏○己巳子時 太皇太后崩於慈甯宮遺詔曰予以薄德幼承 太祖高皇帝登聘獲奉 太宗文皇帝贊助內政越既有年不幸 龍馭上賓痛不欲生誓以身殉諸王大臣以世祖皇帝方在沖齡繼承大統保護靡託合辭堅請勉留此身撫育教

訓未嘗少懈十有九年重遭不造世祖皇帝崩逝悲悼予懷益無  
意人世告 天籲眾冀申初志諸王大臣復以今皇帝冲齡踐阼  
正須鞠育懇請再四予顧此藐孤難忍捐棄勉抑哀衷相依歲月  
今皇帝至孝性成誠切肫懇視膳問安朝夕罔間備物盡志無所  
不周屢薦徽稱尊崇斯極終始惟一幾三十年予因茲敬養遂使  
兩世哀感之懷大爲寬釋且 皇太后奉事勤恪予心甚安但念  
世際昇平皇帝純孝亘古所無予正可誕膺福祉奈年齒逾邁時  
用自傷頃當寢疾皇帝躬省藥餌寢食捐廢步禱 郊壇竭誠呼  
籲乃數盡難挽遠至彌留予壽七十有五得復奉 太宗文皇帝  
左右愜予夙心夫亦何憾今皇帝勵精圖治愛育蒼生海宇乂安  
兆姓樂業天下臣民頌太平之庥者功歸啟佑予歿有榮施焉惟  
是皇帝大孝性成超越今古恐過於悲痛宜勉自節哀以萬幾爲

重中外文武羣臣恪恭奉職勿負委任以共承無疆之福其喪制  
悉遵典禮成服後三日皇帝卽行聽政其持服依世祖皇帝遺詔  
以日易月二十七日而除 天地 宗廟 社稷之祭不可以藐  
躬之故致稽大典及百神祀事照常無停故茲誥諭其各遵行  
上擗踊哀號呼天搶地哭無停聲 皇太后 上暨 皇妃 皇  
子俱成服親王以下文武大小官員外藩王以下及台吉等王妃  
公主以下八旗二品以上官員命婦俱齊集成服嗣是每日哭臨  
二次凡二十七日○諭諸王貝勒貝子公內大臣大學士九卿詹  
事科道等自漢以後帝王居喪持服以二十七月易爲二十七日  
惟魏孝文帝欲行三年之喪朕平日讀史至此常稱贊之今非欲  
邁古賢君祇念朕入歲 世祖皇帝賓天十一歲 慈和皇太后  
崩逝全賴 聖祖母太皇太后鞠養教誨以至成立遽遭大故實

增痛傷哀疾靡盡今定持服二十七月少慰罔極之痛朕獨持於宮中幾政毫無曠廢不令臣民持服一切俱不禁止如此可以遂朕本懷諸王大臣各官其集議之諸王大臣等奏曰 皇上至德純孝自古無倫但帝王之孝與臣民不同願 皇上仰遵 遺誥博稽古制上思 天地 祖宗付畀之重下慰羣臣百姓仰賴之忱以禮節哀易月之典守而勿更得旨朕事 太皇太后三十餘年竭盡衷誠無稍違拂近者 聖體違豫三十餘日衣不解帶必誠必敬朕之此志期在必遂否則貴爲天子富有四海亦奚以爲諸王大臣等聞諭皆感悚嗚咽又奏曰 皇上一身爲 宗廟社稷所寄託每當祭祀伏見 鑾輿親詣竭誠盡敬夫祭爲吉禮必除服後舉行 皇上以 太皇太后之故若使 郊 廟神靈少有弗歆卽 太皇太后在天之靈亦必不安且君臣兆姓本屬

一體若 皇上持服宮中聽臣民卽吉甚非一體之義况 皇上  
奉事 慈甯三十餘年晨昏侍養罔不承順意旨今於 慈闈遭  
命若不曲遵恐有虛 太皇太后惓惓之意臣等不揣愚見敢以  
固請得旨朕意已定不必更奏○禮部奏本朝后喪例不割辮又  
奉 皇太后傳諭 太皇太后不豫時曾向予云我病若不起皇  
帝斷勿割辮應謹遵行得旨 太皇太后教育恩深朕自盡其心  
仍行割辮 上遂割辮○諭禮部朕孝服用布舊制國有大喪自  
宗室公以上服素帛今孝服俱改用布○庚午 上在 大行太  
皇太后梓宮前晝夜號痛不止水漿不入口 天顏癯瘠以致憤  
迷諸貝勒貝子公等及外藩王貝勒貝子公等皆跪奏伏望 皇  
上少自節哀保護 聖躬得旨 親在則竭心力以盡孝歿則思  
報教育之恩終身不忘爲子孫者誼所當然 太皇太后高厚之

恩可一刻忘乎論畢復慟不已○禮部奏欽天監選擇十二月二十九日癸酉卯時 大行太皇太后梓宮發引得旨 太皇太后梓宮速行發引朕心不忍意欲久留 慈甯宮內爾諸臣議奏諸臣奏曰素無久留 寢宮之例應於二十九日發引得旨既如此朕意欲停喪三七另行選期諸臣奏曰我朝向日所行年內喪事不令踰年仍應於二十九日發引得旨爾等念朕躬勞苦朕豈不自知但二十九日發引爲期太近兩皇后梓宮尙遲至多日若以太皇太后梓宮拘舊例謂踰年不便速行發引於大義不合舊例有可從者有不可從者朕意在正月十七十八日方可發引著另行選期具奏諸王大臣等又公會議奏曰本朝向行之例踰年爲忌似宜仍請於二十九日發引得旨爾等所云忌諱止爲朕躬朕殊不避忌朕前禱 天壇尙欲減朕年以增 太皇太后之

壽豈以 梓宮踰年發引乃有避忌乎如有所忌朕躬當之否則

忌諱之說虛誕不足信亦可以破後人之疑使皆以朕爲法 太

皇太后梓宮可擇正月十一日發引○辛未 上在 大行太皇

太后梓宮前晝夜號慟不止水漿不入口如前內閣翰林院九卿

詹事科道等齊集 慈甯宮門公同具奏請 皇上節哀保護

聖躬得旨朕忽遭大故五中憤迷非不知恪遵 遺誥守身爲重

勉自節哀強進飲食但悲從中來情實痛切莫由自主以至昏迷

卽欲少餐饘粥亦不能下咽非故卻不御覽奏具見誠惻朕當強

支自愛卿等無須過慮○諸王貝勒貝子公文武大臣官員公同

具疏奏請 皇上恪遵 遺誥持服二十七日以上慰 列聖之

倚託下憐臣子之惻忱得旨朕從來一言一事必躬行實踐並無

故爲文飾邀取虛名今於宮中持服二十七月朕志已定屢旨甚

明王等其體朕至意遵行○諭諸王大臣等 皇太后聖躬素弱近者 太皇太后病篤朝夕奉侍 慈顏瘦減又因 太皇太后上賓悲哀過甚晝夜不離 梓宮飲食不御愈加羸弱力爲勸慰 皇太后不允爾諸王大臣俱係骨肉至戚應公同奏勸諸王妃郡主等舉哀時 皇太后慟哭幾至仆地眾所共睹今已三日矣 諸王大臣等隨奏請 皇太后節哀回宮暫息 皇太后諭曰皇帝大孝事 太皇太后及予三十餘年承歡靡間敬禮兼隆 太皇太后聖體違和皇上躬親侍奉三十餘日席坐冷地親奉湯藥衣不解帶極其誠孝 太皇太后賓天內廷一切事務皆皇帝躬親料理所以諸事各得詳善今已經三日皇帝痛哭不止容顏甚爲瘦減予心殊覺不甯爾等宜勸皇帝節哀最爲緊要不必向子敦請諸王大臣等復再三叩請 皇太后又諭曰諸王大臣所奏



請予回宮以少慰皇帝之心所言良是下午上食畢予卽率眾同散然雖散亦不過歸自己宮內仍率眾妃俱集於別宮自明日爲始每日三次上食後卽回別宮○諸王大臣等復跪奏 太皇太后上賓已經三日 皇上晝夜號慟不止臣等惶懼不知所措伏乞 皇上暫離喪次於乾清門內不拘何處少爲休息得旨朕遭不幸 太皇太后賓天每思 高厚洪恩寸衷如割更何心緒回宮以圖安逸况 太皇太后上賓以來至今飲食不能入口昨皇太后再三勸進糜粥朕雖勉啜少許究不能下咽朕決意仍在喪次以盡朕心諸王大臣復再三叩請 上不允○禮部以 大行太皇太后常祭禮儀請旨得旨俱照祭 世祖皇帝例○壬申上在 大行太皇太后梓宮前哀慟不止如前諸王大臣等跪奏明日除夕請 皇上暫行回宮得旨除夕避忌果有此說否諸

王大臣等奏曰元旦乃吉祥之日今 聖躬不離喪次臣等甚爲不安叩請 皇上於除夜回宮元旦在宮中停止哭泣得旨數日以來朕心甚覺憤迷今據爾等所奏稍有關係元旦日 太皇太后梓宮前令宮人照常上食 慈甯宮前院內諸皇子等所住帷帳朕當於此暫居一日諸王大臣又再三叩請回宮 上不允○諭大學士內務府總管等 太皇太后疾大漸時諭朕曰 太宗文皇帝梓宮安奉已久不可爲我輕動况我心戀汝皇父及汝不忍遠去務於 孝陵近地擇吉安厝則我心無憾矣諄諄降旨朕何敢違伏思 慈甯宮之東新建宮五間 太皇太后在日屢會向朕稱善乃未及久居遽爾升遐今於 孝陵近地擇吉修建暫安奉殿卽將此宮拆運於所擇吉處毋致缺損著揀選部院賢能官員往敬謹料理天氣甚寒務期基址堅固工程完備爾等卽

傳諭行○ 上於 大行太皇太后梓宮前行常祭禮哀慟如前

內閣翰林院九卿詹事科道等公同具奏以元旦令節叩乞 皇  
上節哀並請回宮得旨據奏元旦請朕還宮人主宮殿原多可以  
因時移蹕若在庶民遭此大故所居止於一室又遷避何所回宮  
斷不可行卿等念切愛君恐朕哀毀過甚諄懇再三勉從所請強  
節哀情諸王大臣等叩首復奏曰 皇上俯鑒下情勉節哀痛臣  
等不勝慰藉但 皇上乃萬邦之主元旦乃歲首之辰特求 皇  
上於除夕回宮元旦後再詣 慈甯宮得旨朕自幼蒙 太皇太  
后教育之恩至爲深厚方且仰報難盡何云回宮朕年正富安享  
之日方長報 太皇太后之日從茲已盡爾等諸王大臣再三奏  
請朕因於元旦日暫移前院此亦從爾等之請耳諸王大臣又再  
三叩首奏曰臣等焉敢求 皇上回宮休息但以元旦乃吉辰局

開 乾清宮所繫甚大得旨朕不幸當此大故設 太皇太后之

變恰遇二十九三十日將若之何亦惟有聚集此處豈可他避也  
因爾等再三奏勸止於元旦暫移少忍哀慟是亦從爾等之所請  
矣今若瀆奏不止則並此言亦不聽從諸王大臣復叩請不已復  
傳旨曰朕意已定並無他說爾等如此執滯朕愈不允從著照前  
諭遵行○召集諸王大臣等將所請以日易月之奏發出諭曰三  
年之喪朕意在必行將欲手書諭旨而朕體疲憊願爾等諸王大  
臣共諒朕懷勉從前諭諸王大臣等奏曰 聖諭必欲行三年之  
喪臣等何敢違執但 聖躬 天地 宗廟及萬民生命所關三  
年斷不可行故自昔賢君皆從易月之制臣等所託命惟有 皇  
上若必令仰承卽加臣等以罪亦所不辭斷斷不敢遵行得旨將  
本暫存閣中過初一日再行啟奏○甲戌 上在 大行太皇太

后梓宮前哀慟不止如前諸王大臣等奏、皇太后曰、皇上在  
慈甯宮明日元旦乃天地人協吉之辰、乾清宮不宜扃閉臣  
等昨者再三跪奏復具奏陳請、皇上未允故臣等復懇祈於  
皇太后、皇上至孝、皇太后敦諭庶冀勉從、皇太后諭曰予  
敦勸兩次、皇帝立意已定矣○是歲朝鮮來貢○人丁戶口二  
千三十四萬九千三百四十一田地山蕩畦地五百九十萬四千  
一百八十四頃八十四畝有奇徵銀二千七百二十六萬二千三  
百七十五兩有奇米豆麥六百九十萬一千四十二石六斗有奇  
草二百五萬七千九百六十四束茶十五萬九千三百一十五引  
行鹽四百三十一萬八千五百六十九引徵課銀二百七十三萬  
九千六百一十二兩有奇鑄錢二萬八千九百九十三萬六千七  
百有奇